


楓山章先生集

七





楓山章先生集

(七)

章懋撰

編主五雲王

編初成集書叢

集生先章山楓  
冊七

中華民國二十四年十二月初版

徐

撰者 章

懋

發行人

王 上海河南路  
雲 五

印刷所

商 上海河南路  
務 印書館

發行所

商 上海及各埠  
務 印書館

（本書校對者 林東塘 宗大樸）

卷

# 楓山章先生集卷之九

詩

七言絕句一百七首

春雪三日

芽拔三陽泰運開。滿天和氣襲人來。如何尙有頑陰在。可是東君未放回。

雨後觀漲

天瓢夜倒雨如麻。曉望川原不見涯。且莫臨流羨河伯。試將秋水問南華。

院庭新樣小戰車。偶觀有作二首·已上  
內死作。

廟堂決策靜邊塵。巧作戎車樣製新。莫道只知俎豆事。胸中兵甲是何人。  
漢殿匈奴出武剛。晉平羌虜用偏廂。車攻原是先王制。定許收功殪犬羊。

送同年鍾美宣乃叔還鄉二首。

紫陌春回雪昨消。御溝流水碧迢迢。行人欲贈新楊柳。催喚東風長綠條。征車欲發重徘徊。落日離亭酒一盃。惆悵阿咸歸不得。夢魂隨上越王臺。

淖沱晚渡

二首。送同年張廷芳使陝西。

風捲流澌作晚波。行人猶說漢淖沱。那知天上乘槎客。不用冰堅也渡河。半川斜日照寒流。騎馬來經古渡頭。欲問蕭王冰合處。野烟衰草遍汀洲。

雲舍寧親

二首。送同年張叔亨歸廣東。

五嶺南頭瘴海圍。白雲飛處是親闈。何人得似張天子。四牡歸來戲綵衣。榕葉梅花嶺路長。皇華持節畫還鄉。此行不似并州使。悵望孤雲隔太行。

題介軒詩卷

二首。爲同年賀京恭作。

半點緇塵不肯容。古來卓行許追踪。東風門巷多桃李。雪後徂徠一樹松。平生高誼薄秋空。柔古那能與世同。柳下英風寥落久。誰將一羽視三公。

送容一之歸廣東

二首。一之名質。白沙陳先生高弟。

洙泗門庭海樣寬。望洋休道問津難。直從伊洛源頭去。鼓棹中流任往還。點瑟顏瓢萬古心。箇中真境要追尋。紫陽去後行人少。門巷蕭條草色深。

送同年謝元吉致政歸未陽

二首。

醒。卻。邯。鄲。炊。黍。夢。便。尋。湘。水。釣。魚。船。時。人。莫。訝。休。官。早。還。落。文。山。後。一。年。  
會。因。立。仗。難。緘。口。苦。爲。求。芻。又。乞。身。貧。病。獨。憐。歸。未。得。送。君。重。憶。故。鄉。尊。

題舒溪漁隱詩卷

爲同年李廷章作。

名。利。關。頭。曾。打。透。一。竿。終。老。白。蘋。洲。明。時。愧。我。渾。無。用。欲。與。先。生。假。釣。舟。

挽杜黃門喬妻

夢。斷。瑤。池。繡。閣。閑。翠。幃。香。冷。燭。花。殘。空。遺。舊。織。迴。文。錦。留。與。黃。門。灑。淚。看。

挽大理陶司務二首

紅。蓮。綠。水。舊。知。名。廷。尉。賓。僚。最。老。成。何。事。玉。樓。仙。去。早。棘。林。風。雨。易。傷。情。  
一。官。未。徙。鬢。絲。絲。誰。遣。藏。舟。壑。遽。移。腸。斷。容。臺。舊。知。己。西。風。揮。淚。寫。銘。詩。

壽李知府嗣母六首

黃。鶴。孤。飛。四。十。年。幾。番。機。斷。曉。牕。前。鄰。姬。只。羨。生。兒。好。恩。誥。時。時。下。九。天。  
誰。教。婺。守。得。龔。黃。寶。婺。當。年。降。北。堂。天。爲。蒼。生。如。有。意。壽。星。夜。伴。婺。星。光。  
一。陽。微。露。嶺。頭。梅。此。日。高。堂。初。度。來。王。事。賢。勞。歸。未。得。夢。魂。飛。遶。越。王。臺。  
南。越。東。陽。萬。里。身。幾。年。不。見。倚。門。人。潘。郎。會。有。閒。居。賦。花。下。安。輿。處。處。春。  
莫。道。無。人。戲。綵。衣。庭。前。賸。有。紫。荆。枝。未。須。便。上。陳。情。表。正。是。君。恩。欲。報。時。

太行山頂自看雲。何似遺羹錫類人。爲報金華賢太守。里閭無限白頭親。

挽林亭大瀚父母

四首。其父先爲上高知縣。歷寧海州。陞撫州太守。

謝郡歸來理釣絲。不堪中夜壑舟移。舊游幾樹甘棠在。常作遺黎墮淚碑。州縣徒勞兩鬢霜。誰將嘉績傳循良。文章有子如歐九。一表瀧岡淚萬行。令德深閨不可窺。卻緣麟趾識關雎。獨憐天上歸來日。白髮無因見倚閭。相夫曾賦采蘋詩。教子猶懷斷織時。回首樟山封馬鬣。烏啼宰樹不勝悲。

送同年沈秋官海使閩還京二首

秋臺元自肅風霜。炎海俄驚五月涼。應是一夫冤未釋。使星中夜入南荒。素馨花發荔枝垂。樽酒江亭話別離。珍重故人天上去。爲言閩海正瘡痍。

建溪舟中口號五絕送同年鄭侍御昱還京

乘驄來按八諸侯。凜凜風霜六月秋。吏蠹民冤俱洗盡。更將謠頌達宸旒。昔人每羨嶽山搖。鎮靜今看一着高。自有澄清真事業。海波不動瘴煙消。武夷無復舊茶株。鑛盡銀場課未除。四牡諮詢多少事。皂囊應有萬言書。萬口嗷嗷待哺時。賑饑無策愧分司。飛章要劾牛羊牧。願放庸材理釣絲。行部無能展一籌。病軀仍抱素飡羞。日邊朋舊如相問。祗欠天曹一筆勾。

送洪憲長之官貴州并序。

恭聞憲長先生榮遷牧伯。遠蒞貴藩。某適爲二豎所困。弗能錢送。伏枕懷私。情不能已。聊賦小四詩絕。以道區區。詞雖不工而事皆紀其實云。

澄清未了旬宣去。玉節星輅出富沙。行李幾扛書籍外。不將一物度仙霞。  
三年閩海諮詢日。萬里口口保障時。獨有挽留諸父老。一聲聲是去思碑。  
忽聞巷語夜如雷。道是閩人借寇來。欲扣天關無路人。明朝相率拜都臺。  
左轄由來拱太微。卻教分省去羅施。遠人應識君王意。不道區區爲鬪絲。

別閩南僚友

三年憲府同懷抱。此日離亭惜解攜。回首建溪溪上路。春山隨處鷓鴣啼。

送賀位賀俸歸永新四首·并序。

歲暮山齋老梅始花。適賀生兄弟過予言別。因折一枝。口占小詩四絕爲贈。用致拳拳期待之意云。

梅花折得贈君歸。此是東風第一枝。看取瓊林新雨後。萬花場上奪魁時。  
梅花折得贈君歸。商鼎和羹會有時。四海蒼生饑渴甚。綠陰青子莫教遲。  
梅花折得贈君歸。老榦虬枝分外奇。絕似廣平心鐵石。生來不受雪霜欺。  
梅花折得贈君歸。愛此亭亭絕世姿。絕白真香誰得似。紫陽千載共襟期。



送鄭仁張銘歸瑞安并序。

東嘉鄭天爵·張永新·不遠千里·過我問易·數月而歸·予愧無所增益之也·口占小詩四絕以贈其行·

風度天香到酒卮。君行恰是桂花時。相期來歲秋風裏。折取蟾宮第一枝。  
東嘉自昔多龍首。禮樂三千對玉墀。白日青天能有幾。梅溪人物是吾師。  
鴈蕩名山天下奇。仰高懷古起遐思。止齋諸老談經濟。邃學雄文百世師。  
論心未久卽言歸。敬義工夫要夾持。潛室舊傳真統緒。歸來應自有餘師。

哭鄉同年二項叔姪 五首·并序·

項崇仁審之·予故人也·其甥鄭天爵·來從子游·知其夢奠·因其回而書以哭之·

昔同文戰澗關秋。二項才名孰與儔。三十年來如一夢。萋萋宿草翳荒丘。  
蚤看雙鷗共橫秋。誰道相催記玉樓。今日送君多感慨。寄將老淚灑松楸。  
豪氣元龍百尺樓。牛刀纔試便長休。悠悠身後無窮恨。伯道淒涼土一抔。  
看花期向曲江遊。同輩相推讓一頭。不見臚傳春殿日。驚聞薤露使人愁。  
激浪陵雲志未酬。翻灰鱗殞使人愁。羊曇悲切平生事。不過西州亦淚流。

送潘匡善援歸括蒼兼柬舜絃先生 二首·

莆陽太守舊相知。節概文章重一時。蘭玉森森知有自。相逢兩月話心期。

故人爲別十年餘。不見雙魚尺素書。邂逅阿咸聊問訊。王官谷裏樂何如。

送唐御史詔巡按江西

二首。其先任蘭谿知縣。

幽陰山下舊棲鸞。攬轡今看度此山。白叟黃童垂淚送。手栽桃李半凋殘。繡衣持斧大江西。驄馬行行莫待遲。幾載血腥章貢水。要君摩手洗瘡痍。

和周郎中木二詩韻

四首。木姑蘇人。時奉使江西。封王。

周萍實橋詩云。楚迷王道可興邦。徒倚禎符國祚長。千載江山類易姓。祇緣萍實謾昭王。

汝墳江漢古名邦。曾見周南化日長。麟趾騶虞渾忘卻。謾誇萍實瑞昭王。橋名萍實表南邦。謠語流傳歲月長。書社不封千載恨。空將霸業望君王。

周路中詩云。奉使岷藩入萬山。虎狼交跡茂林若。聞知行李無私物。任我星輶自往還。

籜節煌煌照楚山。天曹何事落人間。要知沿路官員好。須到萍鄉縣裏還。不持一物度關山。贏得清風滿世間。行向子陵臺下過。客星應識使星還。

哭外舅郭公五首。

磊磊襟懷楚楚儀。客來能酒更能棋。從今寂寞蒼英會。不聽山陽笛也悲。貽謀未必新堂構。餘恨猶懷舊墓田。流水生涯今已矣。撫棺一慟訣終天。夢入南柯竟不還。華堂無復舊衣冠。空存手植庭前菊。留與諸郎灑淚看。

傷心一夜泰山頽。雍露聲中不盡哀。誼重恩深無可報。塚前銘許婿親裁。  
少日東床誇坦腹。年餘四十竟浮沈。自慚不是奇男子。空負平生擇婿心。

烟溪義渡四首。

立馬沙頭欲問津。憑君一葦策奇勳。一時義在烟溪上。千古名芳太史文。  
塵暗長途水拍堤。行逢義士在烟溪。慙慙爲濟蘆中客。莫愛官封楚執圭。  
濟巨平生每自期。歛南聊作小施爲。莫吟幽草高鷗句。未是春潮雨急時。  
楫擊中流應有志。舟橫野渡豈無能。獨憐亭長烏江上。不及滹沱一寸冰。

挽詩四首爲林繡衣貴實作。

貴實·名誠·時  
巡兩浙驛事。

其一寶澗西原誠之祖。

馬鬣封高寶澗西。夏官舊德樹新碑。白頭父老咸相過。共說賢孫似習之。

其二象峯東麓誠之父。

鴈塔歸來臥象峯。景鍾青簡兩成空。孤兒杖淚書遺訓。都在瀧岡一表中。

其三鳳山北隴誠之母。警更嫁。

鳳去山空幾夕陽。九原相見泣孤凰。當時不逐韓憑死。要待新雛羽翼長。

其四塗嶺南窩誠自爲生墓。

躑脫蠅蝸世亦難。幾人打透死生關。一亭得正高千古。塗嶺今來望北山。

挽常山余知縣父母二首。

一經勤苦未收功。忍見舟移夜壑容。三釜竟違人子願。蕭蕭宰樹不禁風。丸膽當年荷母慈。鳴琴今日見佳兒。獨憐幕下焚黃處。不及堂前捧檄時。

和吾景端韻二首·并序。

久陳馳問·方以爲愧·乃承不鄙·曲記賤生·睨之細葛·寵以佳章·厚意稠疊·其何以堪·食貧既久·無可爲謝·謹依嚴韻·聊資二絕·用答來貺。

行年已度知非日。學易應思補過時。珍重故人相問訊。韋編三絕是心期。臯比擁處樂何如。春滿庭前草不除。他日相從問無極。文山風月未應虛。

陳處士南園詩卷四首。

平泉金谷競豪華。幾度花時得在家。爭似南園陳處士。曉看泉石暮烟霞。高臥邱園歲月賒。閑將抱甕作生涯。悠然得道忘機處。笑看紛紛兩角蝸。肉食無緣藿自安。畦蔬聊欲媚春盤。葵傷應有終年憾。片獻難忘一寸丹。我愧貧無三徑資。好花真境逸難期。何時得借名園看。三復堯夫洛下詩。

雲津書院詩卷

三首·爲金華教諭劉故作。

昔人黃卷青燈處。滄海桑田幾變更。獨有龍洲洲上水。東流還作誦絃聲。  
華構淪亡幾百年。雲津風月故依然。天留嘉定文章在。應把貽謀啓後賢。  
前宋衣冠迹已陳。芳洲勝槩屬何人。賢孫今紹箕裘業。雲路還從此問津。

挽金華鄭同知重父二首。

歲蛇忽作康成夢。賦鵬空餘賈誼才。從此未陽溪上菊。風霜時節爲誰開。  
泮水已驚閑絳帳。王門無復見長裾。金華別駕終天戚。忍向窗前讀故書。

挽葉天官侍郎盛

二首。王俸女婿之祖。

華國文章老更奇。康時才業未全施。空餘歐范平生志。不見功名上鼎彝。  
金鑑朝端方委重。玉樓天上忽傳宣。迂生不識平津閣。因誦遺文亦泫然。

挽金氏夫人

二首。正室葉。

九苞鳴鳳正朝陽。丹穴生雛恨失凰。賴有當時胎教在。雲霄萬里看翱翔。  
吹棘恩深渾未報。蓼莪詩廢亦奚爲。堂前捧檄人何在。腸斷秋香桂一枝。

挽耿氏夫人

二首。葉繼室。天官裕之女兒。

采蘋曾賦在公詩。九臆猶懷勸學時。回首堂封春草綠。野烏啼處不勝悲。  
頻向花前奉板輿。俄驚一夢入華胥。春暉寸草情何限。風木蕭蕭恨有餘。

次南部天官林亨大韻

庚申秋·林歸闔祭掃·便道來訪·其韻·

高軒忽枉過山家。不憚雲昏道路賒。元宰爲憐衰病叟。昔年同看杏園花。

榮壽堂

劬勞父母年齡暮。孝理君王雨露深。臣子兩般俱可愧。爲君題卷獨關心。

夜坐得句寄示弟姪

癸亥冬在南雍作兆·嘉山·先府君墓也·

秋初一別又冬殘。欲寫家書意萬端。最是白頭千里外。時時夢到兆嘉山。

甲子新正齋宿有懷新孫詩以勉之

自別吾孫每惘然。重陽不覺又新年。數書相勉無他語。黃卷青燈好著鞭。

羣鵠圖

噪樓曾報黎囚喜。集棘應占太史祥。修竹寒梅無外事。若爲羣語對荒涼。

挽秦行人祖父母二首

道賁邱園世莫知。玉埋幽隴草離離。具州名行垂千古。爲有賢孫似習之。

錫盾少年因脫珥。弄孫暮景見含飴。大行追憶平生事。不讀陳情亦淚垂。

挽秦行人母二首

葛草樛木更蘋蘩。膺有徽音裕後昆。二少賢聲今籍甚。誰云芝醴不根源。

悼亡有夢成炊臼。捧檄無因見倚門。墓下焚黃悲慟處。五花鸞語溼啼痕。

避喧卷 二首·為監丞戴鋪題。

結廬高臥萬松間。為厭輪蹄日往還。用盡機關名利客。綺裘爭似綠蕪閑。采芝無夢到長安。世態榮枯了不關。況有鳳毛鳴盛世。底須園綺出商山。

南都別林王黃陳馬韓葉張諸尙書侍郎

區區蠶繭乞歸。尙未得請。過承盛饌相饒。何以克堪。席間口占小詩一絕。聊以為謝。

野性惟應臥草萊。建章鸞鷲詎堪陪。乞骸未得如疏傅。慚愧諸公祖帳開。

七言律詩 六十五首

登科 內苑作。關老改龍門雁塔作春麟秋鸞。

太平天子御金鑾。奎宿光芒午夜寒。漢代文章推董賈。唐家科第屬歐韓。龍門浪暖成頭角。雁塔風高快羽翰。雖是看花年尙少。莫將溫飽問儒冠。

瓊林賜宴

風雲千載趨重華。賜宴瓊林寵渥賒。丹桂廣寒非月窟。紫烟蓬島是天家。食分綾餅堆紅玉。酒出黃封瀉絳霞。見說金明池上事。有人聞喜不簪花。

早朝

未央鍾動曙光生。隱隱初聞柳外鶯。風靜御爐香篆細。日高斧座袞衣明。螭頭陛擁黃麾仗。豹尾班聯白玉珩。最喜君王勤庶政。蒼蠅聲裏問雞鳴。

禁中聞鶯

禁苑花深晝漏遲。鶯聲遙在萬年枝。不隨舞袖歌金谷。卻伴仙韶奏玉墀。長信夢回欹枕處。瑣闈吟罷倚闌時。東風空費如簧舌。不道明廷有鳳儀。

王孟端畫竹

此君一別已經年。今日披圖不厭看。風度只疑搖翠珮。月明應想下青鸞。肯隨羣卉爭春色。直伴孤松老歲寒。珍重鳳凰池上客。盡將清節付毫端。

圃東新井

鑿井深深傍玉堂。石根流沁一泓涼。冰壺夜浸秋蟾溼。雲液晴涵甘醴香。苔蘚未生侵玉甃。桐陰初長拂銀牀。寒泉可汲應須汲。莫使行人爲斷腸。

秋日感興

昨夜西風襲縵袍。壯懷落落興飄飄。全才人物思韓范。雜伯功名陋管蕭。閩闔萬言陳國論。沙場百戰滅天驕。前修未遠斯文在。九辯何須賦寂寥。

送彭閣老時歸省



出爲蒼生去爲親伊周地望閔曾身暫辭天上青槐位歸拜堂前白髮人五色錦衣供戲舞四時玉燭賴調均故園桑梓休留戀早促鳴騶上紫宸

送楊總兵

山西名將好男兒報國丹心一劍知  
猓口口口嚴號令口口寒膽避旌旗  
九重雨露朝承口口口雲夜出奇此去西口應坐困功成充國早口口

移菊

白玉堂前種紫薇菊花開落在東籬  
爲憐秋後香偏好故向春前手自移  
苒苒旋添承露葉亭亭先長傲  
霜枝樂天只愛黃昏伴一種幽香恐未知

壽同年徐德宏父

家有四玉亭又有靈芝蕉花甘露之異故詩及之

四玉亭前歲月長葛巾藜杖足徜徉  
夏園老去芝應秀儀儼歸來桂正香  
花折瑞蕉供綺席酒和甘露薦瑤觴  
賓筵共祝南山壽開遍蟠桃髮未霜

壽瞿中書父

曾因教子荷鸞封歸去錢塘鬢已蓬  
名利長安無舊夢耆英洛社有遺風  
消磨歲月琴樽裏收拾湖山杖屨中  
長對花前傾壽酒蟠桃看到幾番紅

壽雲南萬都司學士萬安之叔

奕世登壇笏滿牀。獨尋園綺共徜徉。耆英社裏清風在。安樂窩中白日長。南詔衣冠無此老。渡瀘勳業有諸郎。玉堂學士宗盟舊。壽語飛來雲錦章。

送謝守之無爲州

其父先守是州。其弟元吉爲翰林庶吉士。

東風躍馬錦溪傍。重佩而翁太守章。騎竹兒迎新皂蓋。愛棠人說舊黃堂。野田雨秀雙歧麥。燕寢春凝一篆香。難弟正紉金匱史。要看橋梓共循良。

送宋爾章乃弟歸江西

君從壁水泛歸舟。兄在蓬萊第幾洲。春草池塘靈運夢。夜牀風雨子瞻愁。鴈行暫隔千山露。鵬翼還看萬里秋。別後二難相會處。看花騎馬曲江頭。

送國子監侯先生祭掃

丹陛陳情許晝遊。桂花香裏泛歸舟。十年宦況橋門月。千里鄉心浙水秋。天上恩頒新雨露。塚前光動舊松楸。平生風木無窮恨。憑仗龍章賁九幽。

送同年翁進士晏歸省

萬里青霄路始通。白雲情思忽匆匆。一樽別酒歌黃鶴。十幅歸帆逐去鴻。秋雨江村榕葉暗。夕陽籬落槿花紅。慈恩未報天恩重。一念難忘是孝忠。

挽虞黃門瑤妻

醉入瑤池竟不醒。空教炊日夢魂驚。琴悲絃斷膠難續。樹怨花殘子未成。鴛帳夜銷銀燭影。鳳樓春悄玉簫聲。鼓盆無限傷情處。刺繡窗前月自明。

挽陳舉人父

平生愛臥越山雲。不踏長安陌上塵。燈火課兒書屋夜。杜蘅訪舊野橋春。百年風月歸詩律。萬頃烟波入釣綸。今日騎鯨仙去遠。步南清景屬何人。

挽陳舉人母

瑤池渺渺隔滄波。夢逐仙人跨鶴過。無復瑤萱顏色在。空餘慈竹子孫多。燈前夜斷縫衣線。機上春閑織錦梭。最是諸郎哀慕切。啼烏聲裏淚滂沱。

挽國子林助教

一篋十載鬢成絲。心事平生首藉詩。夜月棘闈歸藻鑑。春風芹泮屬爐錘。鱣堂未兆三台瑞。鴈賦俄成百世悲。欲奠東芻何處是。龜紋山下草離離。

謁文丞相祠

呂家墳墓邱墟久。信國祠堂香火新。芳穢定應千載事。榮枯那有百年身。丹青此日瞻遺像。汗簡平生仰後塵。可惜溪山異南北。不成孤竹兩商臣。

又內苑作。閻老批云。激烈之言。誦之可以興起。

大宋興亡跡已陳。忠臣祠宇尙如新。夕陽古樹烟猶暝。夜雨荒塔草自春。慷慨六歌空灑淚。閑關百戰竟捐身。穆陵地下應相見。不負臚傳第一人。

懷古

籌燈夜坐讀書臺。懷古令人不寐來。世遠唐虞文未喪。俗經秦漢事堪哀。周公禮樂眞王佐。管氏功名只竊才。千古是非昭簡冊。豈容蹤跡共塵埃。

謫官出京和莊孔易韻

時舟泊蕭家林下

夕陽道路風塵暗。明月孤村草樹稠。郭隗臺前無逐客。蕭家林下有行舟。音書斷絕家何在。縱跡飄零水共流。此地經過多少事。今年不似昔年遊。

歸鴈

靈囿池臺是舊遊。西風萬里思悠悠。陣橫紫塞霜天曉。影落澄江水國秋。棲止更嫌蘆荻淺。歸飛不爲稻粱謀。一封帶得邊城信。要把平胡報冕旒。

送馬守之廬州

考續還南都省父少宗伯。故詩送之。此後四十首。南雍作。

康侯共羨廬江守。三接親承寵遇來。玄黼纔看辭魏闕。綵衣又喜拜容臺。述懷定有詩千首。話別寧辭酒一盃。萬戶無濡思叔度。莫教五馬此徘徊。

和鄭廷綱侍郎長至有懷

學道年來絕愛憎。肯隨時俗競蝸蠅。新陽已向今宵復。老態應從此際增。賸喜舒長迎化日。仍愁積妬至  
堅冰。衰遲只合居林下。重沐君恩報豈能。

又和鄭嘗被劾時欲乞老故詩及之

特立山來俗所憎。詩人奚必嘆青蠅。貝萋雖甚心何愧。石錯相加德愈增。線日已看回短晷。條風終擬化  
層冰。咸成正欲資元老。君爽言歸恐未能。

和鄭廷綱除夕感懷

滿城簫鼓樂無央。共說明朝是孟陽。卻笑流年成老大。詎堪隨衆廁班行。厭聞爆竹除殘歲。謾對梅花憶  
故鄉。何日得償林下願。簿書鞅掌任渠忙。

送同年王宗彝以大宗伯考績分韻得

春回大地物欣欣。宗伯朝天志不羣。歲運三週當甲子。風雲千載遇華勳。定應制作新寰宇。會見文章媲  
典墳。獨有曲江同宴客。惓惓話別袂難分。

送林亨大以太宰考績分韻得

鸞聲旂泝忽匆匆。元宰書勞覲合宮。曾見昌言天動色。還期大義日當空。賸栽桃李居門下。多貯參苓在  
篋中。老我依劉心正切。不堪分手各西東。

三十餘年別故知。重來京國話心期。喜看大畜亨衢日。正是清朝景運時。身際風雲歸北闕。志先霖雨活

南畿。武丁舊學甘盤在。說命勳庸更屬誰。

又另贈

平生甚愛泉山老。華國文章濟世才。何幸附名龍虎榜。又來話舊鳳凰臺。還期應有丹書奏。當宁欣看赤鳥回。好贊聖明登衆彥。放教衰病臥蒿萊。

壽楊少卿父太守唐

惟得祥氛藹戟扉。黃堂八十古尤稀。蓬壺仙侶雲駢集。光祿賢郎晝錦歸。共慶麟書符繡紱。爭看象簡戲斑衣。趨庭盡付經綸業。不用蒲輪下禁闈。

送林居魯沂之貴州亞參任

以驗封郎中陞

春晚新亭柳正青。紛紛冠蓋送君行。一盃聊作陽關別。萬里難忘魏闕情。婺郡尙留遺愛在。羅施今見福星明。好將忠信行蠻貊。看取甘棠藹頌聲。

挽胡光祿諒父

家住城南尺五天。隱居行義雪盈顛。橫金鳴玉多知己。芳桂猶蘭總象賢。豸服已聞榮晚節。龍章仍見賁重泉。一經收報應如許。貽燕何須負郭田。

送張黃門宦之四川亞參任

諍臣何事出旬宣。宦業乖崖舊有傳。簡命纔聞來北闕。仁聲先已慰西川。一盃別酒愁分袂。萬里修程看

着鞭早賦甘棠歸補袞錦城花好莫留連。

環山樓詩卷

爲太僕少卿  
陳瑞卿題

百尺危樓倚碧空。好山面面列屏風。凭欄遠睇心何曠。對景豪吟興不窮。樹色參差青藹外。鳥聲上下綠陰中。客來俯視三千牝。卻把滁陽作楚宮。

送李司空進表

國老兩章覲紫宸。都門祖帳集朝紳。瑣闥獻納聲名舊。起部賢勞德望新。華渚虹流開壽域。彤扉虎拜慶昌辰。曲江金鑑千秋錄。宣室從容好奏陳。

挽白司寇

少年策足上青霄。四紀忠勤翊聖朝。瑣闥弼違遺舊稿。秋臺明罰布新條。重湖功就舟行穩。萬柳陰成水患消。誰料故園歸樂後。壑舟回首夜寥寥。

和鄭尙書廷綱留別韻

一棹翩然發大江。歸尋綠野舊書窗。萬鍾已覺心無累。九鼎從知筆可扛。名世文章能有幾。急流人物更無雙。高懷不似垂崖老。閑殺尙書意未降。

送鄭尙書

分韻得綠  
青二字

東園先生美如玉。校書早歲發天祿。計省賢勞白髮生。邯鄲夢覺黃粱熟。白巖高風喜有傳。夾漈遺編期

再續王官谷裏樂三休。玉女峯前歌九曲。祗恐君王憶履聲。未容久戀山水綠。  
一鴻天外去冥冥。峻節孤風聳在廷。投笏遠辭丹鳳闕。棹舟閑過白鷗汀。午橋事往名猶在。畫錦詩傳德愈馨。愧我欲歸歸未得。金華山色夢中青。

送太常李少卿旻考績

分韻得堂闕二字。

臚唱曾聞姓字香。奉常今見德彌光。晝歸故里春猶小。績奏明廷日正長。胸次酌量周禮樂。筆端揮灑漢文章。龍顏喜見龍頭客。視草仍留白玉堂。

龍江江頭送君別。衰柳枯枝不堪折。述懷未賦上林烏。探梅且醉西湖月。八磚家世本倫魁。三俊才華尤卓越。清風兩袖去朝天。六箴期補龍袞闕。

送韓司馬文赴北爲大司徒乙丑新正。

杏園花下昔同遊。南國相逢已白頭。樞務賢勞輿望協。板曹新任主恩優。一分須用寬民力。九式還應爲國謀。此別何時重執手。不堪凝睇李膺舟。

送金侍郎澤考績

東風一棹發新河。祖道那堪賦綠波。白髮交游嗟我老。青雲勳業羨君多。辭榮未許歸盤谷。奏績仍催上玉坡。聖主若詢邊塞事。好將干羽化兵戈。

送馬侍郎廷用考績



詞苑容臺久擅名。東風奏績上宸京。浪花袞袞催行色。烟柳絲絲繫別情。粉署郎君思侍教。木天仙侶喜尋盟。好將胸次經綸策。宣室從容啓聖明。

送魏都憲赴北爲少司寇

高平相業邈難儔。千載雲祲紹厥休。纔見觀風行列郡。又催持橐侍宸旒。離情祖道一盃酒。行色關河萬里秋。聖主龍飛新大化。好殫忠赤贊皇猷。

送吳學士儼考績

玉堂學士舊宮臣。器業文章更絕倫。衰補合陪黃閣老。錦歸先慰白頭親。禁庭春柳關心久。客路江楓得句新。宣室從容應訪問。豳風無逸好敷陳。

壽同年徐僉憲

烏府歸來與世違。忽驚佳氣藹庭闈。一階寵命從天降。七袞遐齡自古稀。座上客誇金作帶。膝前兒戲綵爲衣。羨君早適鱸魚興。愧我無端下釣磯。

送大司憲張公敷華還朝考績

三十年前賢部使。又來都下得相親。憩棠南國民謠在。橫挺中臺更曙頻。龍袞體元新大化。豸冠述職際昌辰。這回司馬休歸洛。四海蒼生望秉鈞。

送太宰楊碧川致仕

位正元僚統百官。又承優詔故鄉還。文章舊價留東閣。猿鶴新盟在北山。疏傳黃金因客散。裴公綠野與雲閑。衰遲苦被樊籠繫。悵望冥鴻獨厚顏。

桂巖書院詩卷

爲戴給事  
中銑題

廣寒分種寄靈巖。結屋巖前誦孔顏。庭戶秋來香細細。軒窗月上影班班。絃歌聲徹幽林外。燈火光生密樹間。會見雲仍多邈竇。何須蟾窟遠躋攀。

送程參議考滿丙寅正月。

伊昔仇鸞棲枳日。鳳毛年少最風流。別來四紀猶青眼。到得重逢愧白頭。粉署久勞明殿最。銀臺今復著材猷。東風奏績朝天去。三接行膺寵數優。

送太常李少卿赴史館

聖德神功夔絕倫。纂修開局命儒臣。龍頭望重三朝舊。麟筆書成一代新。待漏鳴珂金殿曉。垂簾揮翰玉堂春。好將斧袞酬天地。揚厲先休啓後人。

送同年魏廷尉赴北爲少司寇

餞別龍江三月春。紛紛冠蓋集朝紳。看花昔幸同黃甲。持橐今看侍紫宸。漢史不冤聲望久。虞廷弼教寵光新。臯謨好爲明時獻。莫向西風憶鱸蓴。

送王司馬致仕還鄉

材猷勳烈重當朝。抗疏辭榮去莫招。曉日都門開祖帳。輕風江渚泛歸橈。魏公晚節吟秋圃。裴老閑情寄午橋。可是太平無一事。角巾私第得逍遙。

送亞都憲陳公壽還西江祭掃

千古江洲說義門。邇來忠孝見雲孫。折衝勳業留人口。獻納聲華重掖垣。幾處松楸頻入夢。九重雨露喜承恩。蘋蘩祭罷催歸覲。莫戀江南水竹村。

送大理汪少卿宗器還朝

丹詔催歸九棘班。桂花香裏泛樓船。罰輕犯蹕追先哲。望重埋輪記昔年。爭看上書規走馬。未須把酒詫登仙。日邊故舊如相問。衰病惟應臥輞川。

杏林春意卷

爲伊延玉題

矢人不若函人良。多君擇術工岐黃。丹爐夜靜火初伏。藥圃春深苗正長。醫國尙閑三昧手。活人聊試千金方。底用門前萬株杏。新詩頌德逾芬芳。

送姪拯之梧州通判任

阿咸謫倅蒼梧郡。骨肉相看悵別離。皓首稀年吾老矣。修途六月子何之。須防馬援遭薏苡。且學東坡啖荔枝。到手功名當努力。瀧岡猶待樹封碑。

秋初

此篇乃謫官出京作失前二句。錄之以俟檢足。



送李廷章侍親南還

春官先生温如玉。幾年出入黃金屋。丹心憂國鬢成絲。紅塵夢覺黃梁熟。封章拜上九重天。願放子房歸辟穀。吾皇優老賜南還。冥冥萬里鴻飛速。路人嘖嘖稱賢哉。都門祖餞分華轂。林下如今見一人。名與五老爭高蠹。江南黃花開正香。何須更羨歸盤谷。先生風致出兩疏。令郎才名過二陸。今春獻策來丹墀。縱橫禮樂三千牘。青年聲價重儒林。發硯寶劍光奪目。承恩奉親歸故鄉。西風一舸書萬軸。行行別我昭王臺。添我離愁百餘斛。一樽酒盡日未斜。浩歌數闋仍擊筑。西江自昔多豪英。勳名赫赫昭汗竹。尊翁弓冶要君傳。更與前修紹芳躅。匆匆聚散不須論。家山未許淹驥足。去時江頭秋草黃。來時須及春草綠。玉堂接踵錦繡文。膝前便是斑衣服。

送撫寧侯朱永北征

口口口騎驚雲中。羽書夜入甘泉宮。君王撫髀思頗牧。將軍勇略千人雄。去年征南聞凱奏。侯印腰間大如斗。今年北伐初受脤。劍鋒擬斫樓蘭首。鐵馬橫行塞口春。口口山瀚海無煙塵。歸來看取麒麟閣。漢家衛霍何其人。

聞彭閣老將至

纔看畫錦謁庭幃。詔書又促歸鳳池。蒼生霖雨望已久。我公袞鳥來何遲。萬里趨朝詎云遠。天風吹舟行若飛。朝聞西江初戒途。夜瞻左轄先騰輝。九重訪落心如渴。席前早赴宣室期。願公大展經綸手。濟川補

袞維其時。

觀鬪雀

綠槐庭院日初曉。羣雀啾啾鬪林杪。奮身不入鴻鵠羣。爭飛聚噪心何小。巢林聊用一枝安。階除粒食充朝餐。爾形甚眇欲易盈。羣居何事與爭端。世人有欲恆不足。爭名奪利相追逐。吁嗟微物何足論。可憐無角能穿屋。

挽張壽夫

張家有子才且賢。秦中諸少誰與肩。十年燈火富文學。飄飄逸氣凌雲煙。秋闈一舉卽高捷。扶搖萬里孤鵬鶩。九重天上叫閭闔。琅玕呈出何軒然。重瞳妙選濟時具。玉堂作養恩如天。大官飲饌出琇味。秘閣文字番瑤編。自言際遇非偶爾。摠忠報國心拳拳。得疾還因倚年少。邯鄲一夢驚長眠。吁嗟生死固常事。如君之死真可憐。素志英英未云遂。衣冠零落歸黃泉。哲人多夭匪人壽。白壁破碎瓦更全。仰天欲訴不可得。夕陽古樹哀鳴蟬。

送總兵內苑考作

天王出震四海清。熙熙田里皆安生。越裳肅慎供職貢。口口既醉歌太平。口口口口太不若。敢與口口邦相抗衡。封豕長蛇肆憑陵。烽煙忽起沙塵驚。君王赫怒奮戈起。召集貔貅百萬兵。元老壯猶有方叔。命汝秉鉞行西征。口城朝策嫖姚騎。留屯夜警亞夫營。秋風淒淒塞草萎。陣雲黯黯關月明。橫飛一劍口口口。玉

關萬里揚威聲。口口一戰滅口口。直取呼韓三百城。撓槍掃盡無妖氛。勒功燕然回帝京。

送人還鄉

分韻得對字

東風送客都門外。祖道紛紛集冠蓋。仗劍樽酒惜解攜。長歌激烈心感慨。江南二月春融融。畫橋煙柳鬢新黛。萬里風波一棹歸。停橈時聽鶯聲碎。故園回首別經年。匡廬山色青青在。多君自是尙書孫。舊業箕裘莫輕廢。人生功名須壯時。駒隙光陰不相待。早修六翮奮秋空。肯隨斥鷃蓬蒿內。交親不用嗟別離。看花有約重相會。縱橫禮樂策三千。明年獨向丹墀對。

壽姜廷器母

姜時知寧海州有瑞麥之異。

寧海使君才且賢。香凝燕寢蒲爲鞭。一錢不受民晏然。芄芃瑞麥盈春田。使君涖官今幾年。使君有母白雲邊。行年八十雪滿巔。方瞳兒齒人中仙。揆予初度元宵前。花燈璧月光綺筵。瑤池蓬萊非妄傳。蟠桃獻壽來雲輶。使君夜望江南天。壽星高臨婺女躔。王事靡盬心懸懸。綵衣何時舞蹁躚。臨風遠寄詩百篇。願祝慈母壽八千。麻姑王母相後先。桑田滄海從變遷。北堂萱草春芊芊。他日歸來奉慈顏。板輿花下長留連。

挽鄭縣丞

同年昱之父。

一官未徙鬢先改。丞負子兮三十載。藍田不作哦松人。九隴還饒遺愛在。西風暮老鄉夢回。桂巖舊業荒蒼苔。飄然掛冠賦歸去。巖前桂子秋正開。惆悵人生能幾許。藏舟夜半不知處。鳩去梁空芝草萎。烏府歸

來淚如雨。

壽唐憲長彬父

越山高高越水清。越人自昔多耆英。睢陽圖畫世爭羨。石帆詩句人尤驚。先生家住祈公里。深得放翁山水趣。風流壽考將無同。更與山陰添故事。祈公放翁去已久。先生壽考真稀有。靈椿未老桂先芳。平生種德燕山寶。不向磻溪垂釣綸。不須漢室迎蒲輪。蓋世功名付兒輩。蘭亭禹穴將終身。楚楚二郎公輔器。明時早攬澄清轡。君王孝理雨露深。丹鳳啣書天上至。先生掉頭一笑看。鶴髮高峨金豸冠。寄言名利長安客。一經莫道收功難。最是南閩廉訪使。膝前時曠斑衣舞。王事靡盬心懸懸。幾回目斷雲飛處。垂弧況是重陽先。滿堂佳氣和祥烟。丹橙紫蟹供綺席。芝蘭玉樹森庭前。賓筵阻慶南山壽。臨風聊寄詩千首。八十從今更八千。年年爛醉黃花酒。

壽周石室

戊午。其子本參浙藩政通義干司。

碩人考槃心翼翼。平生種德不憚勞。蘭桂森森競芬馥。虞山要似燕山高。采芝不入迤邐谷。垂綸不向磻溪曲。消磨歲月酒千鍾。傲睨乾坤棋一局。夙興命僕供犂鋤。夜闌還課諸孫書。致君事業付兒輩。漢家用蒲輪車。楚楚大參公輔器。明時蚤展經綸志。君王孝理雨露深。象簡烏紗天上至。倘來富貴非所期。一經收報人莫知。笑渠名利長安客。機關用盡將奚爲。邇來迎養薇垣裏。何年五福疇堪比。從容戲綵飛霞觴。賡歌稱壽駢珠履。初度正當春半時。祥風麗日呈光輝。燕燕鶯鶯奏和巧。爲公送喜本庭開。賓筵開處



花如繡爭把桃花祝公壽。蟠桃一花三千年。長向花前醉春酒。參政明當登細甃。鹽梅九鼎航巨川。黃麻紫誥重重愛。更看華髮釋貂蟬。

壽金華韓知府

昌黎譽望如斗山。魏公德業光後先。潮州定州遺愛在。綿綿廟食千百年。使君表表出其後。二公心印能親傳。一麾來作東陽守。香凝燕寢蒲爲鞭。泮水已興芹藻頌。南國重賦甘棠篇。專城詎足究施設。會看盛烈追前賢。薇省蘭臺須遍歷。紫巖繡水聊盤旋。黃堂共慶生申節。絃管樽壘巧夕前。玉露金風薦新爽。鵲橋鶴駕來羣仙。天際輝輝耀南極。庭除藹藹浮瑞烟。金華山高石巖巖。萃律終古無崩蹇。閭閻萬口祝公壽。願與山石同高堅。生愁金鼎要調燮。丹鳳啣書下日邊。催侍玉皇香案側。赤松未許長留連。老子山中友麋鹿。忽聞盛事心躍然。載賡吉甫崧高雅。三薰拜獻賓初筵。

挽張都憲敷華母姚節婦

良人蚤峨金豸冠。致身事主遭時艱。口口口口口口烽起。從征一去不復還。偉矣閨中未亡人。固窮志節金石堅。孤燈寒幌矢靡他。柏舟再續三百篇。劬劬夙夜撫遺孤。箕裘舊業期有傳。中丞位望光前烈。幾經斷織丸熊連鏡鸞。孤飛四十年。官原宿草迷寒烟。歸去九泉重執手。此生端不負所天。嗚呼夫死國兮婦死夫。忠貞兩全誰與俱。銘章昭垂千百載。燕許大筆春秋書。

大司憲金公·以使事道經敵邑·特枉見過·出示芙蓉書屋詩卷·命之續貂·予以毫荒多病·且素不能詩·而辭不獲命勉成數語·以塞責焉·

美人築室臨溪澗。觀物玩書心獨古。百凡卉木詎足奇。對此芙蓉自相許。甘處荒寒寂寞鄉。不向洛園爭貴富。酣春容色衆雖同。拒霜氣節誰堪伍。安得紅芳皆此花。倚雲和露直奴虜。美人執法居太微。引領花神登要路。白筆掃盡炎熱徒。澄清素志應無負。回視昔年讀書處。溪上芙蓉卽豐芑。貽謀萬卷書傳香。更有鳳毛爲世瑞。

五言絕句一首·

題白頭翁

底事頭成白。何爲志集枯。覽輝甘寂寞。不羨上林烏。

五言律詩 五首

遊牛首山和沈仲律韻

三首·戊子  
在南部作·

乘輿來山寺。清樽共解顏。院深春晝永。香裊午風閑。短屐行應遍。危欄倦亦攀。白雲飛不定。何處是鄉關。登臨長敗興。塵世幾開顏。償卻三年債。都來半日閑。山泉寒可汲。石磴絕難攀。半榻能分我。看書晝掩關。邱壑眞吾分。簪纓是強顏。無才堪世用。多病愛身閑。猿鶴驚相迓。松蘿鬱可攀。哦詩歸路晚。乘月度重關。

送張都憲瑄用陳公甫韻 二首·在福建作·

萬里無諸國。旬宣僅一年。稻收千澮雨。榕翳幾村烟。保障多新政。規模總昔賢。設施嗟未究。赤鳥又言旋。二南風不作。道喪幾千年。行葦荒秋雨。甘棠老暮烟。繼周遭聖哲。分陝況才賢。好試經綸手。乾坤一轉旋。五言長篇六首。

釋菜

以後四篇。皆內苑作。

皇明右文治。閭巷與膠庠。橋門集多士。冠佩紛踴踴。少窺夫子宮。巍巍數仞墻。仰鑽靡所得。矻矻窮十霜。剽竊精粕餘。乘時幸飛翔。釋褐謁塔墀。對越儼洋洋。采蘋薦溪毛。執爵灌椒觴。百拜舉彝典。報本那可忘。平生迂腐心。峨冠講虞唐。曰茲筮仕初。矢心思激昂。金石勵名節。忠孝恆自將。期不負明訓。允以酬君王。

止賜酒

君王念儒臣。眷養良獨厚。解帶食天廚。日賜黃封酒。飲食貴有節。適時乃无咎。昨詔酒云止。曰茲炎暑候。豈惜麴蘖費。狂藥恐作疾。周書戒崇飲。聖誥垂不朽。嗟彼八達徒。沉酗良足醜。寧爲攝生謀。不問中聖否。皇恩浩如天。欲報慚何有。

本院南新闢三圃

聖門學爲圃。人皆陋樊遲。借問玉堂客。築圃將奚爲。儒冠安淡薄。志不圖甘肥。苦硬根可咬。酸蠹味可知。在貴不忘儉。藿食固所宜。大哉君子心。所存應在茲。苟能充此志。堪作和羹資。試我鹽梅功。濟彼閭閻饑。孰云謀生計。日夕勤敷菑。不有公儀休。拔棄園中葵。

送翟瑄知奉化縣

製錦須良工。牛羊求善牧。越人久凋弊。賣絲糶新穀。保障良獨難。烹鮮莫撈摠。當寧仁元元。出宰用言宓。借君庖丁刃。試手雞與鶩。琴橫單父堂。絃歌武城俗。寥寥千載餘。君行踵遺躅。明年看政成。聲價連城玉。送白沙先生陳公甫南都作。

洙泗迴且深。伊洛浩不息。建溪一以逝。末流日湮塞。浙水泛功利。西江浸虛寂。寥寥宇宙間。何人踐斯域。陵夷二百年。儒術轉乖僻。爭先取青紫。明經竟何益。有美羅浮仙。遺編自探索。章甫非我心。鏗然只鳴瑟。尚友千載人。充然如有得。禮樂古三王。刪修今六籍。墜緒何茫茫。仰鑽容致力。回瀾障百川。屹立中流石。任重道路長。行行慎無斁。斯文諒有在。前修未應沒。何當謝塵紛。雲山隨杖鳥。共對梅花春。細叩先天易。

壽味菜吳先生學士儼之父

古稱陽羨里。一壑風烟浮。山川萃佳氣。孕毓外名流。達者位公卿。勳業垂不朽。隱居務行義。善慶貽厥後。先生出其間。況乃神明肖。潤身兼潤屋。有德尤有壽。膏粱非不美。所味惟元修。趙孟非所志。園綺爲吾儔。養高在空谷。教子登瀛洲。褒封煥龍章。如川至天休。一福世所罕。乃獨五福裒。喬松培靈液。玉瓊注黃流。惟茲弧矢辰。適屆天中候。日遲東井躔。風引南薰奏。翠叢芳蘭艾。錦英燦葵榴。乳燕賀未歇。青鳥聲相酬。華堂開壽域。綺席羅珍羞。嘉賓來遠邇。雜珮鏘琳球。高臺然絳燭。古鼎裊青虬。翩躚戲菜綵。賡歌薦金甌。清歡當此日。先生百不憂。瀛洲感仙侶。詩章集曹劉。慇懃祝遐算。海屋頻添籌。借問壽何如。蟠桃三千秋。

詞六首

感皇恩

天順戊寅·賀郭老員外受封

富貴樂餘春。春長不老。聖主褒崇。頌渙號。五雲縹緲。飛下一封鸞誥。把平生教子心。都酬了。翠管喧庭。紅旗夾道。賀客歡聲徹雲杪。恁般勝事。占斷人間榮耀。畫堂無限風光好。

步蟾宮

庚辰·賀姜廷器登第還鄉

天邊榜動黃金色。都人爭羨龍門客。瓊林宴罷看春花。馬啼踏遍長安陌。君王詔許歸鄉國。錦衣白晝歡何極。如今端的是男兒。這榮耀人間第一。

千秋歲

壽人六十·代門生張昊作

收燈過了。恰是懸弧曉。壽筵敞。霞觴倒。蔬陳堯澗韭。果薦安期棗。雙溪上。誰知也有蓬萊島。膝下斑衣。遠堂前。珠履笑人。不老春長好。已注神仙錄。何須中令考。真榮耀。椿庭況有君王詔。

歸朝歡

爲縣官作·送知縣唐韶赴召

雞割牛刀應莞笑。桃李滿城何足道。萍鄉更鼓正分明。乖崖忽薦官員好。紫泥封又到。飛鳧遠赴君王召。羨青年功名富貴。天已安排了。別離底用傷懷抱。爲報攀轅諸父老。九重前席問蒼生。還將霖雨甦枯槁。候朝天未曉。諫章時向燈前草。看明朝袖中霹靂。多少人驚倒。

又

爲縣官作·送知縣許翻考滿赴京

玉殿傳臚登上第。錦製蘭江聊小試。河陽謔說滿城花。中牟休詫桑間雉。獨甘冰蘗味。勤民不顧身勞瘁。這三年恩波萬頃。深似雙溪水。山城歲晚梅初蕊。冉冉飛鳧天上去。黃童白叟競攀轅。等閑莫把歸期負。依依難捨處。只愁去攪澄清轡。且從容一樽別酒。三疊陽關句。

御街行

爲儒學師生送張吳歲貢赴京

胸蟠萬卷虹光吐。期唾手功名取。幾番操瑟向齊門。無奈鍾期難遇。孟郊科第。買臣富貴。時節相將矣。觀光上國從今始。穩步上青霄路。壯懷落落賦驪駒。不道綠波南浦。鵬程萬里。龍門三浪。總是平生志。

賦一首

中秋賞月賦 丙戌內閣考試

素吳司時。蓐收行政。日道西陸。斗回西柄。大火下於坤維。虛宿中乎離正。掃赤熒之煩酷。布金行之清靜。豆雨飽兮初歇。梧風颯兮漸勁。涼露零而金莖香。灝氣浮而玉宇淨。燕翩翩以東歸兮。鴈嘹嘹而南競。蟬咽聲以不鳴兮。鷹奮迅而欲橫。南呂之律始中。西兌之治方盛。繫三五之良宵。適平分之秋令。暮烟霽而雲容四斂。潦水澄而天光遙映。斯時也。陰精陽彩。坎象懸空。西魄已載。東魄未終。望舒御兮。駕冰輪於海東。素娥舞兮。調霓裳於曲中。穆穆兮。金波有影。團團兮。玉斧無功。寒玉臂兮。清輝皓皓。溼雲鬢兮。香霧濛濛。既委照兮。珠簾華屋。亦容光兮。瓊牖桑蓬。普真明而無私兮。羌萬里之攸同。人世總清虛之府。皇都一蕊珠之宮。予於是盍朋簪。開賓筵。酌清醕。調朱絃。暢幽懷於寥廓。邀勝賞於嬋娟。歌坡翁之水調兮。唱晁

叟之洞仙。修歐陽之翫事兮。賦希逸之佳篇。喜美難之兼具。樂風景之無邊。已而銀河斜漢。玉繩低纏。爽籟發於林外。天香散於庭前。惜光陰兮易度。愛良夜兮無眠。羣鷺既息。衆音並傳。幾處樓臺。絲管沸兮。樂歌舞於芳年。誰家門巷。砧杵急兮。碎窮愁之萬千。慨人間之憂樂。感天上之缺圓。徘徊俯仰。不覺爲之太息。而淒然。客有語予者曰。賞心易負。美景難留。可人明月。屬此清秋。今夕之會也。追玉堂之勝賞。無天柱之遠遊。據牀笑傲兮。若登武昌之樓。咏詩諷誦兮。如泛牛渚之舟。騁清談之疊疊。浩清興之悠悠。人生有幾。不樂何求。子獨感慨而惆悵兮。殆有類乎宋玉之窮戚而悲憂。子乃喟然歎曰。子豈知予者哉。予竊怪夫少年之偷閑兮。寧能爲時物而解顏。吁嗟乎哲人之用心兮。固將視一世以爲悲歡。月明而無貴貧兮。人情見月。抑忻戚之多端。有天涯兮遊子。家山萬里兮疎問安。今茲之夕兮。望白雲而倚欄。有遠地兮孤臣。懷耿耿兮寸丹。今茲之夕兮。念瓊樓之高寒。彼閩閩之饑饉兮。十室九空。擷草穗以爲糧。對明月兮賦鴻鴈而自傷。彼邊城之將卒兮。胡笳羌笛。老征戍於沙場。對明月兮指玉關爲故鄉。月照兮深閨。有佳人兮愁斷腸。邊衣兮未寄。盼良人兮天一方。月照兮圍屏。有縲囚兮悲夜長。雉羅羅兮未脫。刻木畫地兮那可忘。富貴歡會兮。貧苦憂思。今夕之樂者。幾何人兮。而悲窮悼屈者。紛其若茲。伊苦樂之相忘兮。抑亦居之所移。塞予懷之鬱鬱兮。良獨有感於斯。志先憂而後樂兮。謂希文其吾師。彼風流之庾謝兮。徒曠達奚爲。今九重之仁聖兮。憂元元之瘡痍。恆宵旰以孜孜兮。曾不暇乎樂漢武影娥之池。顧書生之竊祿兮。一升合皆民脂。愧無才以上佐天子而下弔蒼生兮。其何心乎樂明月而娛嬉。子以予爲悲秋之騷客兮。

其不淺之爲小丈夫也耶。嗚呼噫嘻。客聞予言。亦悚然若驚。焦然而弗寧。遂相與舉盃酌月。稽首乞靈。願國家隆唐虞之治。使斯人爲堯舜之氓。老安少懷。各得其所。遠來近悅。咸遂其生。囹圄空兮永期。有司之不犯。兵甲洗兮寧復有苗之徂征。家家見月兮有忻然之色。人人對景兮無嘆息之聲。豈若唐人聯句而專長日之樂。殆猶虞氏鼓琴而公解慍之情。則吾與子非特誇今夕一時之樂事。且將祝皇明萬世之太平。

贊八首

韓魏公贊內苑作

昔宋昭陵有臣魏國。可屬大事。重厚如勃。允武允文。有才有德。人司諫垣。闕補衰職。出司邊寄。膽寒西賊。執政三朝。惟公是式。定策受遺。手扶紅日。天下晏然。泰山磐石。身係安危。國同休戚。豐功盛烈。鼎彝是勒。於千萬年。有赫奕奕。

蕭御史器用父像贊其父曾任學官王府官

肅容端如。盛服稽如。身之曜而道則內腹。文之郁而朴以自居。馬帳橫經。士皆我模。楚筵設醴。禮不我渝。人皆知爲當代之文儒。籛金匪貴。鯉庭是趨。有冠峨豸。有臺棲鳥。人又知丹穴之有鳳雛。噫。是皆得其蘊。而徒語其膚。彼其梁棟榱角。在宋則安定之胡。明道正誼。在漢則江都之舒。究先生之所存。殆將與若人而齊驅者歟。



白司冠像贊

甲子秋·其子鏞·  
主試南都·老贊·

質偉而豐。神完以充。淵淵乎其德之懿。翼翼乎其貌之恭。英英乎其才之敏。恢恢乎其量之洪。方嶽旬宣。而優優其政。臺端執法。而肅肅其風。入參廟謨。則不動聲色。而運籌折衝。出幹不庭。則不勞血刃。而執訊陳兇。光垂竹帛。勳勒鼎鍾。嗟儀刑之已遠。儼生氣之如虹。日茲待漏之像。猶可想見夙夜匪懈之忠。而其所蘊以出將而入相者。豈丹青所得而形容。

吳仲仁像贊 乙丑十月。

吁嗟若人。鄉之彥兮。潤屋潤身。衆所羨兮。賓賢禮士。老不倦兮。貽燕後昆。惟一善兮。眉壽考終。天之眷兮。吁嗟若人。鄉之彥兮。

許冢宰像贊

孕崧高之秀。鍾河洛之英。氣剛以直。質粹而清。始薦名於鄉榜。仍賜第於大廷。內司言責。則正色直詞。著張桓之威望。外贊兵機。則運籌制勝。樹韓范之勳名。任司馬而裨廟謨。於帷幄位冢卿而付公論。於銓衡以道事君。魯惠三黜。而不以爲辱。竭忠謀國。楚文三仕。而不以爲榮。躬操蹇蹇之節。心懷翼翼之誠。張曲江之風度。雖可模於方冊。裴晉國之靈臺。則莫狀於丹青。

永瞳兄像贊

鶴髮童顏。烏紗綵服。其貌恂恂。其儀肅肅。無諂無驕。內知止足。不怨不尤。外無憂辱。非義不爲。惟善是爲。

抗志林泉怡情松竹垂及百齡備全五福貴非有位富不以祿有隕自天忽承寵渥此昔人之所稀而吾兄之所獨。

顧雲和像贊

蚤以才猷奮身從事初筮枳棲遂躋錦製斬披草棘創新官署轉危而安易亂而治遺愛在民烝嘗弗替太史衰衰垂休百世。

伊振舉像贊

其容偉如其服禮如其業非儒其行則儒文之不足而質有餘利之不競而誼是趨吁嗟若人其韓康宋清之徒歟。

吳晦仲畫像贊

有婉其容有肅其儀醉經飽史尤邃於詩志充所養將大厥施采芹泮水擢桂鄉闈和變始鳴忽繫金柅玉成器而遽毀苗就實而忽萎起良朋之永嘆貽後嗣之遐悲。

外舅郭公像贊

儀容偉然胸次夷然考槃擊壤無懷葛天有淑其姿克儷厥美無非無儀葛覃中饋儼儼相成德音莫遠用昌厥後麟趾螽斯拜瞻遺像儼乎如在追頌平生涓埃山海。

